



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWEKUCALA LWEKWENGETA (FAL)

LIPHEPHA LEKUCALA (P1)

LWETI 2010

EMAMAKI: 80

SIKHATSI: 2 ema-awa

Leliphepha linemakhasi lali-10.

TICONDZISO KULABAHLOLWAKO

1. Leliphepha lehlukaniswe tigaba LETINTSATFU:

SIGABA A: Siviso	(30)
SIGABA B: Sifinyeto	(10)
SIGABA C: Luhlelo Nekusetjentiswa kwelulwimi	(40)
2. Fundza tonkhe ticondziso ngekucopehela.
3. Phendvula yonkhe imibuto ngeSiswati.
4. Cala LESO NALESO sigaba ekhasini LELISHA.
5. Dvwebela ekugcineni kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengoba tinjalo.
7. Shiya umugca emkhatsini wetimphendvulo takho.
8. Bhala ngebunono nangesandla lesifundzekako.
9. Caphelisisa sipelingi/lupelomagama nendlela lewakha ngayo imisho.

SIGABA A: SIVISISO

UMBUTO 1

1.1 Fundza lethekesthi lengentasi bese uphendvula imibuto lelandzelako.

Tibhedlela tiye tigcwale tigulane letilimele etingotini tekusha. Umuntfu loshile, ikakhulu loyo lonetilondza letivuvukile, udzinga emazinga lasetulu etakhamtimba temaphrotheni. Emaphrotheni asita kutsi tilondza tekusha tidzambe ngekushesha. Emkhatsini wekudla lokungumtfombo wemaphrotheni kubalwa lubisi nemikhicito yalo, inyama lebovu, inyama yenkhukhu, inhlanti nemabhontjisi. Kubalulekile kutsi siguli sinakekelwe ngetidzingo tekudla letisifanele kute sisheshe silulame. Umuntfu loshe kakhulu uye acilongwe ngubodokotela kute bahlale lizinga lekusha bese bamendlulisela kulabatiko.

Emabhamuta lanemanti angabhamutwa, futsi silondza singafakwa umutsi. Nkz. Gertrude Hluyako losati setemitsetfo yekudla esibhedlela eTonga, utsi umtimba udzinga emaphrotheni nemalitha emanti kute ukwati kubukana netidzingo tekudla. Umuntfu loshe ngalokwengcile kufanele afakwe liphayiphi le-driphi yemanti letawusita umtimba kutsi ubuyise emanti lalahlekile njengoba kusha kwemtimba kuvula indzawo yekuphuma kwemanti emtimba.

Umuntfu loshile usengotini lenkhulu yekutfole emagciwane njengoba lesikhumba sisuke sivulekile. Ngemuva kwekufakwa idriphi yemanti umuntfu abe sewufakwa liphayiphi lelisemcoka kakhulu lelathiwa ngekutsi yi-*nasal gastric tube*. Leliphayiphi liniketwa tigulane letishe kakhulu, lisuke licuketse kudla lokudzingwa ngumtimba lokusuke kuluketjete lolunotse ngemaphrotheni.

Sati setemitsetfo yekudla esibhedlela lesidvume ngekusita bantfu labashile sitsite siguli sekusha baye babuke lizinga lekondleka kwemtimba nobe ngabe asikashi kangako. Sizatfu saloko kwekutsi kuye kwenteke kutsi siguli sisuke sivele sinemazinga lamancane emaphrotheni. Ngekwenta njalo basuke baciniseka kondleka ngalokuphelele kwetigulane kute tisheshe telapheke. Lusito lwekucala lubalulekile kute usite kudzambisa tihlungu taloshile.

Khetsa imphendvulo lefanele kulemibuto lengentasi.

1.1.1 Ngumuphi umuntfu lodzinga lizinga lelisetulu lemaphrotheni?

- A Umuntfu loshe enhloko.
- B Umuntfu lonetilondza letivulekile tekusha.
- C Umuntfu loshiswe ngemakhemikhali.
- D Umuntfu logulela ekhaya.

(1)

1.1.2 Tibhedlela tiwela ngaphasi kwaliphi litiko

- A Litiko Letemfundvo Lesemazingeni Laphasi
- B Litiko Letemanti Nemahlatsi
- C Litiko Letemphilo
- D Litiko Letemisebenti

(1)

- 1.1.3 Kubangwa yini kutsi tigulane letilimele ngekusha tidzinge kudla lokwehlukile kuletinye?
- A Kungobe tibuya etindzaweni letehlukene.
 - B Kungobe vele atitsandzi kudla lokufanako.
 - C Kungenca yemazinga ekusha kwaleso sigulu.
 - D Kungobe tiyakwesaba kudla lokushisako. (1)
- 1.1.4 Liphayiphi ledriphi lifakelwani kumuntfu losuke ashe kakhulu?
- A Lisita umtimba kutsi ubuyise emanti lalahlekile.
 - B Umphimbo usuke ubuhlungu kakhulu.
 - C Siguli asikhoni kutidlisa ngekwaso.
 - D Bonesi basuke bavilapha kudlisa sigulu. (1)
- 1.1.5 Nkz. Getrude Hluyako usita ngani?
- A Nguthishelakati wesikolo
 - B Ungumhlengikati walabashile
 - C Weluleka labashile ngetekudla
 - D Ungumphatsi wesibhedlela saseTonga (1)
- 1.1.6 Nika libito lesibhedlela leselapha labashile lelisetheksthini. (1)
- 1.1.7 Kubaluleke ngani kufakwa kwe-*nasal gastric tube* kumuntfu loshe kakhulu? (1)
- 1.1.8 Sihlobo sakho sishiswe ngemanti, shano kutsi ungasisita njani. Bhala KUBILI longafanelanga ukwente. (2)
- 1.1.9 Kubangelwa yini kutsi tati temitsetfo yetekudla tikhutsate tigulane letishile kudla emaphrotheni nekunatfwa kwemalitha emanti? (2)
- 1.1.10 Kungani kutsiwe umuntfu loshile usuke asengotini yekutfolela emagciwane? (1)
- 1.1.11 Kuhle ngani kutsi siguli sihlolwe, kubukwe lizinga lekondleka kwaso? Nika tizatfu LETIMBILI. (2)
- 1.1.12 Ngekubona kwakho kubaluleke ngani kufuna lusito lwekucala kuloyo loshile? Bhala emaphuzu LAMABILI. (2)
- 1.1.13 Kumele ube ngumuntfu lonjani nawufuna kufundzela buhlengikati? Bhala emaphuzu LAMABILI. (2)
- 1.1.14 Bhala tinhlobo LETIMBILI tekudla lokumumetse emaphrotheni. (2)

1.2 Bukisisa lesibonwa lesingentasi bese uphendvula imibuto letawulandzela.



[Sowetan, 14 January 2010]

- 1.2.1 Ngekubona kwakho bamyisa kuphi lomntfwana? (1)
- 1.2.2 Lesibonwa lesingenhla ngabe sitsetfwe kuliphi liphephandzaba? (1)
- 1.2.3 Bhala libito lenyanga lekushicilelwe ngalo leliphephandzaba ngeSiswati. (1)
- 1.2.4 Yini leyenta lomntfwana akhale, asiphalate? (1)
- 1.2.5 Ucabanga kutsi nakatjela uyise utawusitakala yini lomfana? Nika sizatfu. (1)
- 1.2.6 Kuliciniso yini uma lomake atsi nabo bacala kanjalo. (1)
- 1.2.7 Ngabe kubaluleke ngani kutsi umntfwana ayiswe esikolweni? (1)
- 1.2.8 Nawubuka buso balomfana ngabe bukhombani? Khetsa imphendvulo lefanele. (Kujabula, kukhatsateka, kukhala) (1)
- 1.2.9 Ngekubona kwakho lomfanyana uyofundza liphi libanga? Bhala inombolo ngemagama. (2)

SAMBA SIGABA A: 30

SIGABA B: SIFINYETO

UMBUTO 2

Fundza lethekesthi lelandzelako bese uyayifinyeta ngemagama langabi ngaphasi kwalangema-50 aphindze angabi ngetulu kwalangema-60.

- Sifinyeto sakho asibe ngendlela yemaphuzu. Lamaphuzu akho abe ngemisho legcwele **lemumetse emaphuzu lasikhombisa lakhomba tinyatselo letingalandzelwa uma ufuna umfundzate.**
- Khombisa linani lemagama lowasebentisile ekugcineni kwemphendvulo yakho.

KUTFOLAKALA KWEMFUNDZATE

Kunemali lenyenti letfolakala kuhulumende netinkampani letitsite letisita bantfwana labadzinga umfundzate. Kulitfuba lalowo nalowo mfundzi kutsi ahambe afuna lolo lusito lolungaphumelelisa tinjongo takhe.

Cala ngekucabangisisa kwekutsi ufuna kufundzelani. Yenta lucwaningo lwetinhlobo tetifundvo temsebenti longatifundzela. Loku ungakwenta ngekutfole lwati ngekuvakashela tindzawo letehlukene lapho kwentiwa khona lomsebenti lowutsandzako. Kuyenteka ngalesinye sikhatsi kutsi letinye tifundvo atikabaluleki emphilweni yakho, ngako-ke tsatsa tifundvo lobona kutsi utawuphumelela kuto nekutsi uyativisisa kamatekuletjeni.

Faka sicelo sendzawo yekufundza etikhungweni temfundvo lephakeme njengenyuvesi nobe emakolishi kusenesikhatsi kute utewutfole indzawo. Sebentisa umphumela weluhlolo lwangaJuni nobe Julayi uma ufaka sicelo.

Nangabe sewemukelwe, faka sicelo selusito lwetimali. Kumele ucikelele kwekutsi sibopho losentako nesikhungo lesitsite uyasivisisa yini. Kunetinhlobo letehlukene telusito lwemifundzate letingasetjentiswa ekutfutukiseni imfundvo yakho. Sikhwama Savelonkhe Setimali Letisita Bafundzi singumfundzate lowacalwa nguhulumende kusita bafundzi emfundvweni lephakeme. Lolusito lunikwa bafundzi labakhombisa imphumelelo etifundvweni tabo.

Lusito lwemali lebolekwa ebhange ngenhloso yekufundza lona aludzingi kutsi ube ngumuntfu loweswele kuphela. Ludzinga ube nemuntfu losebentako, lotakumela futsi akhone kubhadala lesikweleti nangabe wena wehluleka.

Imifundzate leniketwa nguhulumende, tinkampani nabosomabhizinisi yona iniketwa bafundzi labaphumelela kahle etifundvweni tabo. Loluhlobo lwelusito lunemibandzela lebekiwe lefaka ekhatsi kusebentela inkampani nobe hulumente ngemuva kwekucedza tifundvo.

Uma ucela lusito lwetimali kumele ube nekhophi yamatisi wakho waseNingizimu Afrika, siciniseko selihlobo lebatali bakho, emakhophi abomatisi netitifiketi tekutalwa tebantfwana bakini labafundzako. Caphela, kufaka sicelo akusho kutsi vele utawutfole lusito loludzingako.

SIGABA C: LUHLELO NEKUSETJENTISWA KWELULWIMI

UMBUTO 3

Fundza lethekesthi lelandzelako bese uphendvula imibuto letawulandzela.

Khaliphile bekafundza eMangaliso School eKapa. Abefundza libanga lesihlanu, ayintfombatane lehlakaniphile leyayiwutsandza umsebenti wayo. Phela bantfwana labahlakaniphile basheshe batibone tintfo. NgeMsombuluko ekuseni Khaliphile wacela kuya emthoyi kuthishela. Watsi nakabuya khona wabona emadvodza lamabili emabaleni esikolo angena ekilasini lakhe. Wanaka tintfo letimbili ngalamadvodza, abefihle tibhamu futsi abukeka ngatsi ayingoti endzaweni.

Akazange acitse sikhatsi Khaliphile, wavele wagijima njengempunzi wacondza ehhovisi lathishela lomkhulu, wafike wamtjela ngaloko lakubonile, Thishelanhloko akazange angabate, wavele washayela emaphoyisa. Ngenhlanhla lenhle sitheshi semaphoyisa sasisedvutane nesikolo, avele ashesha efika emaphoyisa. Kwakuthulile esikolweni, letigebengu betingene ekilasini lesine kusuka kuleli laKhaliphile.

Kulelo nalelo kilasi abefika acondze kuthishela, bantfwana babhace ngaphasi kwemadeski. Letigebengu betifike titsatse tonkhe tintfo tathishela letimcoka. Tatsi natifika ekilasini lesihlanu tahlangu netimbila tiftutsa, tatsi tiyabaleka emaphoyisa atitungeletela, atibopha, atidzabula ngetimphama ahamba nato. Emaphoyisa akhandza kutsi letigebengu tiphetsa tibhamu tekwebiwa.

Bothishela baba nenhlanhla kubuyelwa tintfo tabo. Emuva kwekuba emaphoyisa asahambile naletigebengu, bothishela basale babutana kutsi emaphoyisa ati njani ngalengkinga. "Bongani Khaliphile losekilasini laMiss Mathanjana," kwaphendvula thishela lomkhulu. Khaliphile wachaza konkhe lakwentile emuva kwekuba abone tigebe ngu. Bothishela bativa batichenya ngaKhaliphile. Miss Mathanjana akazange awuvale umlomo ngesento saKhaliphile. "Ulilandzele sibili ligama lakho, ubohlala unesibindzi," kwasho emagama athishela. "Halala! Halala!"

3.1 Bhala ligama linye endzaweni yemagama ladvwetjelwe.

Bantfwana bagijimisana bayawungena lapho bafundzela khona. (1)

3.2 Nika mcondvofana waleligama lelitfolakala kulomusho longentasi lodvwetjelwe.

Wachaza konkhe lakwentile emuva kwekuba abone tigebengu. (1)

3.3 Akha umusho locuketse ligama lelingumfutiselo waleligama lelidvwetjelwe kulomusho longentasi.

Kwakuthulile esikolweni, letigebengu betingenile. (1)

3.4 Ngusiphi siga senkhulumo lesakhombisa kumbongela Khaliphile? (1)

- 3.5 Bhala umusho locuketse imfundzisolite letsintsa imiva yalabanye kuletheksthi lengenhla. (2)
- 3.6 Chaza lenkhulumo:
- 3.6.1 Miss Mathanjana akazange awuvale umlomo ngesento saKhaliphile. (1)
- 3.6.2 Bothishela bafuna Khaliphile kutsi abachazele ngendzima layidlalile ekubambeni tigebengu. (1)
- 3.7 Khetsa KUNYE. Lesaga lesingentasi singasho loku lokulandzelako:
Tigebengu tahlangu netimbila tiftutsa.
- A Bangani nebantwana
B Babaleka
C Bahlangana nemaphoyisa bangakalindzeli (1)
- 3.8 Uma Khaliphile abona tigebengu esikolweni sakhe wafikelwa yini? Khetsa YINYE imphendvulo.
- A Kujabula
B Kwesaba
C Kuhalalisela (1)
- 3.9 Endzaweni yeligama lelidvwetjelwe faka mcondvophika walo.
"Ulilandzele sibili ligama lakho, ubohlala unesibindzi" (1)
- 3.10 Lemisho lelandzelako icuketse tiphi tinongo tenkhulumo?
- 3.10.1 Emaphoyisa atibopha atidzabula ngetimphama. (1)
- 3.10.2 Khaliphile wavele wagijima njengempunzi wacondza ehhovisi. (1)
- 3.11 Endzaweni yeligama lelidvwetjelwe faka lenhlonipho.
NgeMsombuluko ekuseni Khaliphile wacela kuya emthoyi kuthishela. (1)
- 3.12 Funa sisho kuletheksthi lengenhla lesisho loku lokulandzelako.
Miss Mathanjane akazange ayekele kukhuluma ngesento saKhaliphile. (1)
- 3.13 Sebentisa ligama "libala" emishweni LEMIBILI livete imicondvo lemibili leyehlukeni. Lasebaleni nalofihlakele. (2)

[17]

UMBUTO 4

Fundza lethekesthi lelandzelako bese uphendvula imibuto letawulandzela.

Ematinyo akhe Sebentile atsi phu ngeliphunga. Ungafunga utshi udle ligundvane lelibolile. Aphindze abe mnyama kwangatsi entsetse yona iphila ngalokuluhlata. Uyati wena, umnz shube nawukhuluma naye shengatsi ungasebentisa sipontji sekutivikela kuleliphunga. Angimange sengiyibone intfombatane letenyanya kangaka, kwangatsi ngulesidzala! Tindlebe tona tibolile, kugicika tigonagona, kantsi-ke kuhloba akubiti ngisho indibilishi yodvwa le. Buka –ke, indlukati lahlala kuyo akatihluphi ngisho kuyishanela. Nakalambilie uphekisa labo bantfwana kudla. Dkt Funimali lisoka lakhe litsetsa njalo nje. Kudla udla esitolo lomfana ngoba kuhlala etinsileni kubuhlungu. Umuva nje atsi "Tsanyelani nine". Labantfwana phela abakutsandzi kutsetsiswa kepha bakhutsele kusitana nenina.

- 4.1 Khokha ligama lelingumfakela kulethekesthi bese ulisebentisa emshweni lotakhele wona. (1)
- 4.2 Bhala lesifinyeto lesidvvetjelwe kulomusho lolandzelako ngalokuphelele: **'Dkt.** Funani lisoka lakhe litsetsa njalo nje' (1)
- 4.3 Sebentisa libito 'ematinyo' emshweni lotakhele wona libe ngumentiya. (2)
- 4.4 Khokha umusho lonesentakutsi bese uyasidvwebela. (2)
- 4.5 Cala lomusho lolandzelako ngeligama lelikubakaki.
(Litinyo ...)
- Ematinyo akhe atsi phu ngeliphunga. (2)
- 4.6 Calisa lomusho lolandzelako nga 'cha': (2)
- 'Kudla udla esitolo lomfana'
- 4.7 Phindza ubhale lomusho ube yinkhulumo mbiko.
"Tsanyelani nine!" Kusho Sebentile. (2)
- 4.8 Cala lomusho lolandzelako ngeligama lelikubakaki.
(Itolo ...)
- "Kuhloba akubiti ngisho indibilishi yodvwa le" (2)
- 4.9 Phindza ubhale lomusho lolandzelako bese ubhala bofeleba lapho kufanele khona.
'mnz shube, nawukhuluma naye shengatsi ungasebentisa sipontji. (2)

- 4.10 Funa sabito sekukhomba kuletheksthi lengenhla bese usisebentisa emshweni lotakhele wona. (2)
- 4.11 Lungisa lomusho lolandzelako:
"Ungafunga utshi udle ligundvane lelibolile" (2)
- 4.12 Bhala tento letikuletheksthi letimumetse letimphambosi letilandzelako:
- 4.12.1 Imphambosi yekwentana (1)
- 4.12.2 Imphambosi yekwentiwa (1)
- 4.13 Shano kutsi lomusho ukuyiphi indlela yesento. Khetsa imphendvulo lefanele kuleti lonikwe tona.

Tsanyelani nine!

- A Indlela lecondzisako
- B Indlela leyamile
- C Indlela lephocako
- D Indlela lesalibito (1)
- [23]

SAMBA SIGABA C: 40
SAMBA: 80